

COVID-19: Kes kembali melonjak, 6,239 kes baharu dan 75 kematian
Astro Awani
09 Jun 2021
Umavathi Ramayah

KUALA LUMPUR: Kes baharu COVID-19 negara kembali melonjak selepas merekodkan 6,239 kes dalam tempoh 24 jam yang lalu.

Semalam Malaysia merekodkan 5,566 kes, menyaksikan trend penurunan beberapa hari sebelum kes meningkat semula hari ini.

Ketua Pengarah Kesihatan, Tan Sri Dr Noor Hisham Abdullah berkata, Selangor terus kekal mencatatkan kes baharu tertinggi dengan 2,291 kes, diikuti Kuala Lumpur (704 kes) dan Negeri Sembilan (507 kes).

Sementara itu, katanya, Perlis merekodkan kes paling rendah dengan hanya empat kes. "Dengan 6,239 kes baharu, ini menjadikan jumlah kumulatif kes meningkat kepada 633,891 kes," katanya dalam kenyataan di Twitter, di sini pada Rabu.

Sementara itu, Dr Noor Hisham memberitahu, 75 individu lagi meninggal dunia menjadikan sejumlah 3,611 kematian dilaporkan di Malaysia sejak bermulanya pandemik.

Katanya, 905 individu sedang menerima rawatan di unit rawatan rapi (ICU) dengan 453 daripada mereka memerlukan bantuan alat pernafasan.

Menurutnya, kes sembuh bagaimanapun mengatasi kes baharu dengan 7,386.

Sementara itu, Dr Noor Hisham berkata, kadar kebolehjangkitan COVID-19 atau R-naught (Rt) di negara ini terus menunjukkan penurunan dengan semalam mencatatkan 0.95.

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-malaysia/covid19-kes-kembali-melonjak-6239-kes-baharu-dan-75-kematian-302345>